



Il Comissari Rocheton al cjalave fis par tiere il grum di cinise.

- Chi al è stât cometût un delit, - al diseve fra sè. - Un brut delit, salacor un dai plui bruts e triscj che o vedi mai viodût.

Intant, di lontan, un pont neri al diventâve simpri plui grant, fintremai di figurâ la stampe di un omenut. Al jere Spilot che corint al stave rivant daûr da ostarie, su la stradele da sgjave, propit lî che Rocheton lu spietave.

Il Comissari si jere alçât impins. La muse pinsirose.

- La gnot passade, propit in chest lûc, - al veve scomençât - cualchidun al è stât copât, intun mût barbar e feroç. Cumò ti conti il câs dal grum di cinise. Un om al tornave a cjase tranquil, fintremai che il sassin lu à cjatât e sburtât par tiere. Po dopo lu à pestât cuntun baston fin a stupidîlu. E cence pietât... Lu à brusât!

- Ma Comissari... - al veve rispuindût Spilot, - al è dome un grum di cinise...

- Spilot! - Rocheton si jere sustât. - Aromai tu varessis di savê cemût procedi. Cjale e sint ben. La cinise je ancjemò cjalde. In bande si viôt un toc di baston cun la ponte brusade. Sigûr al è chel che il sassin al à doprât par pestâ chel puar om. Ma la robe plui brute, cjarissim il me amì, a son i vues che si viodin ator da cinise... A son chei da l'om. Intindînsi, ce che al reste! Ce impression, ce delit salvadi... Ce brute maniere di murî...

Spilot al jere restât cence peraulis. I voi plantâts par tiere.

- Ma Comissari... - al veve decidût di riscjâ ancjemò une volte. - Mi somein masse piçui i vues, par che a sedin chei di un om...

- Spilot! Sigûr il sassin, par finî svelt la sô brute opare al à butât sot dal fûc simpri di plui, in

mût che si cunsumedin di corse...

Intant che a cjacarâvin, da bande çampe al jere rivât l'ostîr cu la cariole. Daûr il so garzon. Cuan che al stave par pontâ la pale su la cinise, il Comissari Rocheton lu veve fermât.

- Ce fâstu ostîr! Chest al è il lûc di un delit!

- No, Comissari... - al veve dit il garzon. - Iar di sere Manlio Sorghete al à fat colâ dute la çjar da griglie su fûc. O vin cirût di cjapâ su alc cul baston, ma al jere masse tart!

- Spilot... - al dîs Rocheton. - Eco sberdeât il câs dal grum di cinise.

di Massim Furlan